

## 每週經課朗誦經文(巴克禮漢羅/教羅)2014/08/24

### 共同經課 - 1 出埃及記一章八節~二章十節

8 埃及有新 ê 王興起, m̄-bat 約瑟 ê。9 伊對伊 ê 百姓講: 看 ah, chit-ê 百姓, 以色列人, 比咱 khah-choē, khah 強; 10 來 ah, 咱 tiòh 用計策來款待 in, 驚了 in 加添真 choē; 後來若 tú-tiòh 交戰 ê 事, in kap 咱 ê 對敵連合, 來攻擊咱, koh tùi chit-ê 地上去。11 Tùi án-ni, 設立督工 ê 管轄 in, 用重擔苦楚 in; in 就 kā 法老起 Pí-tong、Lân-sek 兩個城做府庫。12 總是 ná 苦楚 in, in ná choē ná 開闊。Tùi án-ni, 就為 tiòh 以色列人掛慮。13 埃及人就督責以色列人做苦工; 14 hō in 做工 tiòh 磨, 生活艱苦, chhiau 土做磚, kap 作田裡 hiah-ê 工; tī 一切所做 ê 工無 m̄是真嚴。15 有希伯來 ê 拾姐母, 一個名 Si-hut-láh, 一個名 Phó-a。16 埃及王對 in 講: Lín kā 希伯來 ê 婦人人拾 kiáⁿ, 看 in 臨盆 ê 時; 若是 ta-po gín-á, tiòh hō伊死; 若是 cha-bó gín-á, thang hō伊活。17 總是拾姐母敬畏上帝, 無照埃及王 ê 命令來行, 竟然留 ta-po gín-á ê 活命。18 埃及王就叫拾姐母來, 對 in 講: Lín 啥事 án-ni 做, 留 ta-po gín-á ê 活命? 19 拾姐母對法老講: 希伯來 ê 婦人人 kap 埃及 ê 婦人人無同; in khah 快便, 拾姐母猶未到, in 已經生了。20 上帝好款待拾姐母; 百姓加添真 choē, 極其強盛。21 拾姐母因為敬畏上帝, 上帝就 hō in 成家。22 法老吩咐伊 ê 眾百姓講: 凡所生 ê ta-po-kiáⁿ lín tiòh kā 伊 hiat 落河; 一切 ê cha-bó-gín-á, lín tiòh 留伊 ê 性命。1 有一個利未族 ê 人, 去 choā 一個利未族 ê cha-bó-gín-á。2 Hit-ê 婦人人懷孕, 生一個 kiáⁿ; 看見伊是清秀 ê gín-á, 就 khng 伊三月日久。3 後來看 boē koh khng 得, 就為 tiòh 伊取蘆竹 á ê 箱, 用石油 kap 瀝青糊伊; 將 gín-á hē tī hit 內面, lok tī 河邊, 蘆葦 ê 中間。4 伊 ê 大姊遠遠 khiā-teh, ài 知伊會 tú-tiòh 怎樣。5 法老 ê cha-bó-kiáⁿ 落來河裡, beh 洗浴; 伊 hiah-ê 女婢行遊 tī 河邊; 伊看見蘆葦 ê 中間有箱, 就差一個女婢 già 來。6 掀開看見 gín-á; 看 ah, gín-á teh 哮。伊就憐憫伊, 講: 這就是希伯來人 ê gín-á。7 伊 ê 大姊 kā 法老 ê cha-bó-kiáⁿ 講: 我去 tī 希伯來婦人人 ê 中間叫一個奶母, kā 你 io chit-ê gín-á, 好 mah? 8 法老 ê cha-bó-kiáⁿ kā 伊講: 你 thang 去 ah。Cha-bó-kiáⁿ 就去, 叫 gín-á ê 老母。9 法老 ê cha-bó-kiáⁿ kā 伊講: 抱 chit-ê gín-á 去, kā 我 io 伊, 我 beh hō你工錢。婦人人就抱 gín-á 去 io 伊。10 Gín-á 漸漸大, 婦人人就帶伊到法老 ê cha-bó-kiáⁿ hia, 做伊 ê kiáⁿ。伊 kā 伊號名叫摩西, 講: 因為我 tùi 水裡救伊出來。

### 共同經課 - 2 詩篇一百二十四篇

1 上崎 á ê 詩; 大衛所做。1) 以色列 taⁿ tiòh 講, 若 m̄是耶和華贊阮, 2 若 m̄是耶和華贊阮, Tī 人起來攻擊阮, 3 Tī in 對阮發受氣 ê 時, 就將阮活活吞落去; 4 Hit 時 chiah-ê 水的確 poāⁿ 過阮, 河水的確淹密阮。5 凶狂 ê 水的確淹密阮。6 願耶和華受 o-ló, 因為伊無將阮做食物, 交 hō in pō-食。7 阮 ê 性命親像鳥 á, 脫離掠鳥-ê 羅網; 羅網破裂, 阮就脫離。8 阮得 tiòh 幫贊, 是靠耶和華 ê 名, 伊是創造天地 ê。

### 共同經課 - 3 羅馬書十二章一節~八節

1 兄弟 ah, 所以我因為上帝 ê 憐憫勸 lín 獻家己 ê 身軀做祭, 是活 ê, 聖 ê, 上帝所歡喜 ê; 這是 lín 神靈 ê 服事。2 莫得 kap chit 世間 siāng 款; tiòh 用心志換新來變化家己, hō lín 能明白甚麼是上帝善良, thang 歡喜, 純全 ê 旨意。3 因為我對所 hō我 e 恩 kā lín 中間 tàk 人講, lín 所想來忖度家己, m̄-thang poāⁿ 過 tī 應該想 ê; 所想 tiòh 安份來想, 照上帝所賞賜 tàk 人信 ê 份量。4 因為親像咱一身有百體, 但是百體 ê 功用無 lóng 相同; 5 án-ni 咱 choē-choē 人 tiàm-tī 基督做一身, tàk-ê 相全做體。6 咱照所 hō咱 ê 恩, 已經得 tiòh 恩賜, 各無相同; 或是做先知, 就 tiòh 照信 ê 份量來講; 7 或是辦 t'ai-chì, tiòh 致意 tī 辦 t'ai-chì; 8 或是教示人 ê, tiòh 致意 tī 教示; 或是勸勉 ê, tiòh 致意 tī 勸勉; 調助 ê, tiòh 用實心; 治理 ê, tiòh 用慇勤; 憐憫 ê, tiòh 用歡喜。

### 共同經課 - 4 馬太福音十六章十三節~二十節

13 耶穌已經到該撒利亞腓立比 ê 境界, 問伊 ê 學生講, 人 teh 講人子是 chī-chūi? 14 In 講, 有 ê 講是行洗禮 ê 約翰; 有 ê 講是以利亞; koh 有 ê 講是耶利米, á 是先知人 ê 一個。15 伊就 kā in 講, 若是 lín 講我是 chī-chūi? 16 西門彼得應講, 你是基督, 真活上帝 ê Kiáⁿ。17 耶穌應伊講, 西門, 巴約拿, 你有福氣 ah; 因為血氣肉體 ê 無指示你, 就是我 tī 天裡 ê 父指示你。18 我 koh kā 你講, 你就是彼得, tī chit-ê 石磐頂我 beh 起造我 ê 教會, 陰府 ê 關隘也 boē 贏伊。19 我 beh 用天國 ê 鎖匙 hō你; 見若你 tī 地裡縛 ê, tī 天裡亦 beh 縛伊; 見若你 tī 地裡放 ê, tī 天裡亦 beh 放伊。20 Hit 時就禁戒學生, 莫得 kā 人講伊是基督。